

ইয়াকুব (আ)-এর বৈবাহিক জীবন ও সন্তান-সন্ততি

ইয়াকুব (আ) মাতুললয়ে পৌঁছিয়া তাহার গবাদিপশু লালন-পালনের দায়িত্ব গ্রহণ করেন। মামার দুই কন্যা ছিল, বড়জনের নাম লিয়া এবং ছোটজনের নাম রাহীল। সাত বৎসর পর ইয়াকুব (আ) মামার ছোট কন্যা রাহীলকে বিবাহ করিতে আগ্রহ প্রকাশ করিলেন। কিন্তু মামা তাঁহার সহিত জ্যেষ্ঠা কন্যা লিয়ার বিবাহ দিলেন। কারণ জ্যেষ্ঠা কন্যাকে অবিবাহিত রাখিয়া কনিষ্ঠা কন্যার বিবাহদান তাহাদের রীতিবিরুদ্ধ ছিল (বিদায়া, ১খ., পৃ. ১৯৫)। অবশ্য পরে আরো সাত বৎসর (বিদায়া, ১খ., পৃ. ১৯৫; বাইবেলের আদিপুস্তক, ২৯ ও ২৭) মামার পশুপাল চরাইবার পর তিনি তাহার কাঙ্ক্ষিত

মামাত ভগিনী রাহীলকেও বিবাহ করিতে সক্ষম হইলেন। তৎকালে একত্রে দুই বোনকে বিবাহ করা বৈধ ছিল। তাহার কন্যা লিয়ার সহিত জুলফা (সিন্ধা) ও রাহীলের সহিত বিলহা নামী দুইটি দাসীও দান করেন। পরে দুই স্ত্রী স্ব স্ব দাসীকেও ইয়াকুব (আ)-এর সহিত বিবাহ দেন (বিদায়া, ১খ., পৃ. ১৯৫)।

আল্লাহ্ তাআলা এই চারজন স্ত্রীর গর্ভে ইয়াকুব (আ)-কে দ্বাদশ পুত্র ও এক কন্যা সন্তান দান করেন। প্রথম স্ত্রী লিয়ার গর্ভে রুবিলা (রুবেন=পুত্রকে দেখ), শামউন (শিমিয়ন=শ্রবণ), লাবী (লেবী=আসক্ত), ইয়াহূ (যিহূদা=স্তব), ঈসাখর, অপর বর্ণনায় ইব্নসাখর (ইযাখর=বেতন) ও যাহূদ (সবুলুন=বসবাস) নামে পাঁচ পুত্র সন্তান এবং রাহীলের গর্ভে হযরত ইউসুফ

(যোশেফ= বৃদ্ধি) ও বিনয়ামীন
(বিনয়ামীন=দক্ষিণ হস্তের পুত্র), তৃতীয় স্ত্রী
এবং রাহীলের দাসী বিলহার গর্ভে দান
(বিচার) ও নাফতালী (মল্লযুদ্ধ), চতুর্থ স্ত্রী
এবং লিয়ার দাসী যুলফার গর্বে জাদ, অপর
বর্ণনায় হয় (গাদ=সৌভাগ্য) ও আশীর
(ধন্য) জন্মগ্রহণ করে (বিদায়া, ১খ., পৃ.
১৯৭; আরও দ্র. পৃ. ১৯৫; আল-কামিল, ১খ,
পৃ. ৯৫-৬; তাফসীরে তাবারী, বাংলা অনু.,
২খ, পৃ. ৩৬৭-৮; বাইবেলের আদিপুস্তক,
২৯ ও ৩২-৩৫; ৩০ : ১-২৪; ৩৫ : ১৮ ও
২৩-২৬)। বিনয়ামীন ব্যতীত ইয়াকুব (আ)-
এর সকল সন্তান তাঁহার মাতুলালয় হাররানে
(তাবারীর মতে বাবিলে) জন্মগ্রহণ করেন।
ইয়াকুব (আ)-এর উসীলায় আল্লাহ্ তাআলা
তাঁহার মামার সম্পদে, বিশেষত
গবাদিপশুতে প্রচুর বরকত ও প্রাচুর্য দান

করেন। তিনি মোট বিশ বৎসর মাতুলালয়ে
অবস্থান করেন (বিদায়া, ১খ., পৃ. ১৯৫)।
পরে আল্লাহ তাআলা ওহীর মাধ্যমে ইয়াকুব
(আ)-কে তাঁহার পিতৃভূমিতে প্রত্যাবর্তনের
নির্দেশ দান করেন এবং তাঁহাকে সহায়তা
দানের প্রতিশ্রুতি ব্যক্ত করেন (বিদায়া, ১খ.,
পৃ. ১৯৫)। তদনুযায়ী তিনি সপরিবারে প্রচুর
সম্পদসহ পিতৃভূমি হেব্রনে ফিরিয়া আসেন।
আসার পথে রাহীল "আফরাছ" (ইফরাত বা
বেথেলহাম) নামক স্থানে বিনয়ামীনকে
প্রসব করার পরপরই ইনতিকাল করেন।
ইয়াকুব (আ) তাহাকে এখানেই দাফন
করেন এবং তাহার কবরের উপর একটি
প্রস্তর স্তম্ভ স্থাপন করেন (বিদায়া, ১খ., পৃ.
১৯৭; বাইবেলের আদিপুস্তক, ৩৫ ও ১৬-
২০)।

ইব্ন কাছীর (র) আহলে কিতাবের বরাতে উল্লেখ করেন যে, কানআনে বসবাসকালে ইয়াকুব (আ)-এর একমাত্র কন্যা দীনাকে এতদঞ্চলের রাজপুত্র শিখীম অপহরণ করে। শিখীমের পিতা জামূর (হমোর) তাহার পুত্রের সহিত এই কন্যাকে বিবাহ দেওয়ার প্রস্তাব করিলে ইয়াকুব (আ)-এর পুত্রগণ বলিলেন যে, তাহারা খাতনাহীনদের সহিত আত্মীয়তা করেন না। যদি তাহারা সকলে খাতনা করিতে সম্মত হয় তবে উক্ত প্রস্তাব গ্রহণ করা যাইতে পারে। তাহারা খাতনা করিবার তৃতীয় দিনে অসুস্থ হইয়া পড়িল। এই সুযোগে ইয়াকুব (আ)-এর পুত্রগণ রাজ-পরিবারে আক্রমণ চালাইয়া শিখীম ও তাহার পিতাসহ বহু লোককে হত্যা করেন। এই আক্রমণে রাজবংশের শক্তি খর্ব হইয়া যায় (দ্র. আদিপুস্তক ৩৪ : ১-৩১)। বাইবেলে

বর্ণিত এই ঘটনাটি নবী পরিবারের মর্যাদার পরিপন্থী বিধায় গ্রহণযোগ্য নহে।

কুরআন মজীদ হইতেও ইয়াকুব (আ)-এর বারজন পুত্র থাকার ইঙ্গিত পাওয়া যায়।

ইউসুফ (আ) তাঁহার পিতার নিকট তাঁহার স্বপ্নের কথা এইভাবে ব্যক্ত করেন :

"হে আমার পিতা! নিশ্চয় আমি দেখিয়াছি একাদশ নক্ষত্র, সূর্য ও চন্দ্রকে, আমি এইগুলিকে আমার প্রতি সিজদাবনত অবস্থায় দেখিয়াছি" (১২ ও ৪)।

ইব্ন আব্বাস (রা)-র মতে একাদশ নক্ষত্র অর্থ ইউসুফ (আ)-এর একাদশ ভ্রাতা এবং সূর্য ও চন্দ্র অর্থ তাঁহার পিতা-মাতা

(তাফসীরে ইব্ন আব্বাস, পৃ. ১৯৩;

তাফসীরে উছমানী, সৌদী সং, পৃ. ৩১২,

টীকা ২; মাআরেফুল কোরআন, সংক্ষিপ্ত

সৌদী সং, পৃ. ৬৫১, কলাম ২; তাফহীমুল কুরআন, সূরা ইউসুফ, ৪ নং টীকা)। ইবন আব্বাস (রা)-র মতে ইউসুফ (আ)-এর স্বপ্ন দর্শনকালে তাঁহার হযরত ইয়াকুব (আ) মাতা রাহীল জীবিত ছিলেন (তাফসীরে ইব্ন আব্বাস, পৃ. ১৯৩)। তাফসীরে কুরতুবীতে বলা হইয়াছে যে, তখন তাঁহার মাতা জীবিত ছিলেন না, তাঁহার সত্যতা লিয়া জীবিত ছিলেন। শেষোক্ত মত সত্য হইলে ইয়াকুব (আ) সপরিবারে মিসর গমনকালেও লিয়া জীবিত ছিলেন। কারণ ইউসুফ (আ)-এর রাজ-দরবারে তাহাদের উপস্থিতি প্রসঙ্গে কুরআন মজীদে বলা হইয়াছে :

"এবং ইউসুফ তাহার মাতা-পিতাকে উচ্চাসনে বসাইল এবং তাহারা সকলে তাহার সম্মানে সিজদায় লুটাইয়া পড়িল" (১২ : ১০০)।

বাইবেল হইতে জানা যায় যে, লিয়া ইয়াকুব (আ)-এর জীবদশায় মারা যান (আদিপুস্তক, ৪৯ : ৩১)। তাঁহার অপর স্ত্রীদ্বয় কখন মৃত্যুবরণ করেন সেই সম্পর্কে কিছু জানা যায় না।

হযরত ইয়াকুব (আ) পুত্রগণের মধ্যে বৃদ্ধ বয়সের পুত্র ইউসুফ (আ)-কে সর্বাধিক স্নেহ করিতেন। স্বপ্নের বিবরণ শুনিয়াই তিনি তাঁহাকে নিজ ভ্রাতাদের নিকট তাহা গোপন রাখার উপদেশ দেন, যাহাতে তাহারা তাহার ক্ষতিসাধন করিতে না পারে (দ্র. ১২ : ৫)।

১২ : ৬ হইতে ১৮ আয়াত পর্যন্ত তাহার বিরুদ্ধে সৎ ভ্রাতাদের ষড়যন্ত্র ও তাহা বাস্তবায়নের ঘটনা উল্লিখিত হইয়াছে। সর্বাধিক প্রিয় সন্তানকে হারাইয়া হযরত ইয়াকুব (আ) পুত্রশোকে এক পর্যায়ে দৃষ্টিশক্তি হারাইয়া ফেলেন এবং পরবর্তী

কালে ইউসুফ (আ)-এর জামা তাঁহার মুখমণ্ডলে স্পর্শ করাইলে তিনি পুনরায় দৃষ্টিশক্তি লাভ করেন (দ্র. ১২ : ৮৪ ও ৯৬)। এক সময়ে কানআনে দুর্ভিক্ষের প্রাদুর্ভাব হইলে ইয়াকুব (আ) তাঁহার দশ পুত্রকে খাদ্যশস্য সংগ্রহের জন্য মিসরে প্রেরণ করেন। ইউসুফ (আ) তাহাদেরকে দেখিয়া চিনিয়া ফেলেন কিন্তু নিজের পরিচয় গোপন রাখেন, অবশ্য তাহারা তাহাকে চিনিতে পারে নাই (দ্র. ১২ ও ৫৮)। তিনি তাহাদেরকে পর্যাপ্ত খাদ্যশস্য দান করেন, গোপনে তাহাদের ক্রয়মূল্য ফেরত দেন এবং তাহারা পুনর্বার আসিলে তাহাদের কনিষ্ঠ ভ্রাতাকে সঙ্গে করিয়া আনিবার জন্য জোর তাগিদ দেন (দ্র. ১২ : ৫৯-৬২)। তাহাদের কনিষ্ঠ ভ্রাতা এবং ইউসুফ (আ)-এর সহোদর বিয়ামীনই ছিলেন তখন ইয়াকুব (আ)-এর

সর্বাধিক স্নেহের পাত্র। মিসর হইতে ফিরিয়া আসিয়া তাহারা পিতাকে মিসরের শাসনকর্তার অনুরোধ সম্পর্কে অবহিত করিল এবং বিয়ামীনকে তাহাদের সঙ্গী করা হইলে তাহার নিরাপত্তার প্রতিশ্রুতিও প্রদান করিল (১২ : ৬৩)। ইয়াকুব (আ) বিদায়কালে বলিলেন :

“আল্লাহই রক্ষণাবেক্ষণে শ্রেষ্ঠ এবং তিনি সর্বশ্রেষ্ঠ দয়ালু” (১২ ও ৬৪)।

দ্বিতীয়বার তাহারা মিসর পৌঁছিলে ইউসুফ (আ) তাঁহার সহোদরকে সুকৌশলে নিজের কাছে রাখিয়া দেন এবং নিজের পরিচয় সহোদরের নিকট ব্যক্ত করেন (দ্র. ১২ : ৬৯-৭৯)। বিয়ামীন মিসর হইতে প্রত্যাবর্তন না করায় ইয়াকুব (আ) আল্লাহর তরফ হইতে ইঙ্গিত পাইলেন যে, তাঁহার স্নেহের ধন ইউসুফ (আ) এখনো জীবিত আছেন। তিনি

পুত্রদের সহিত সাক্ষাতের জন্য ব্যাকুল হইয়া উঠিলেন। এইজন্য তাহার অপর পুত্রগণ তাঁহার প্রতি অনুযোগ (দ্র. ১২ : ৮৬) করিলে তিনি বলেন :

“আমি আমার অসহনীয় বেদনা এবং আমার দুঃখ শুধু আল্লাহর নিকট নিবেদন করিতেছি। আমি আল্লাহর নিকট হইতে জানি যাহা তোমরা জান না” (১২ : ৮৬)। তৃতীয়বার তাহারা মিসর পৌঁছিলে ইউসুফ (আ) তাহাদের সামনে নিজের পরিচয় ব্যক্ত করেন, তাহাদের পূর্বের কৃতকর্মের কথা স্মরণ করাইয়া দেন এবং তাহাদের জন্য ক্ষমা ঘোষণা করেন এবং তাহাদের সকলকে সপরিবারে মিসরে চলিয়া আসিতে বলেন (দ্র. ১২ : ৮৬-৯৩)।

তখন তিনি স্পষ্টভাবে ইউসুফ (আ)-এর নাম উচ্চারণ পূর্বক তাহাদেরকে পুনরায় মিসরে

যাইতে বলেন। তাহারা ইউসুফ (আ)-এর দরবারে উপস্থিত হইয়া অনুনয়-বিনয় করিয়া তাহাদের জন্য রসদ সরবরাহের আবেদন জানায়। তিনি তাহাদের সঙ্গে পিতার জন্য নিজের জামা প্রেরণ করেন (দ্র, ১২ : ৯৩)। চতুর্থবারের সফরে হযরত ইয়াকুব (আ) সপরিবারে মিসর গমন করেন। তাহারা শহরদ্বারে পৌঁছিলে ইউসুফ (আ) পিতা-মাতাকে আলিঙ্গনের মাধ্যমে অভ্যর্থনা জানাইয়া নির্ভয়ে ও নিরাপদে রাজধানীতে প্রবেশ করিতে বলেন। রাজ-দরবারে তিনি পিতা-মাতাকে তাঁহার পাশে বসান এবং দশ ভ্রাতা তাঁহাকে রাজকীয় সম্মান প্রদর্শন পূর্বক সিজদা করে (দ্র, ১২ : ৯৯-১০০)। তখন ইউসুফ (আ) বলেন :

"হে আমার পিতা! ইহাই আমার পূর্বেকার স্বপ্নের ব্যাখ্যা, আমার প্রতিপালক উহাকে

সত্যে পরিণত করিয়াছেন" (১২৪ ১০০)
দ্বাদশ পুত্র হইতে দ্বাদশ গোত্র
হযরত ইয়াকুব (আ)-এর দ্বাদশ পুত্র হইতে
আল্লাহ তাআলা দ্বাদশ গোত্রের উন্মেষ
ঘটান। এই সম্পর্কে কুরআন মজীদে সুস্পষ্ট
ইঙ্গিত বিদ্যমান ও

"আমি তাহাদেরকে দ্বাদশ গোত্রে বিভক্ত
করিয়াছি" (৭ : ১৬০; আরও দ্র. ৫ : ১২;
এবং ২ : ৬০)।

পুত্রগণের মধ্যে হযরত ইউসুফ (আ)-এর
নবুওয়াত সম্পর্কে কুরআন মজীদে সুস্পষ্ট
উল্লেখ আছে, কিন্তু তাঁহার অবশিষ্ট ভ্রাতাগণ
নবী ছিলেন কি না সেই বিষয়ে কোন উল্লেখ
নাই। অধিকাংশ তাফসীরকারের মতে
তাহারা নবী ছিলেন না (বিদায়া, ১খ, পৃ.
১৯৮)। অবশ্য কতক তাফসীরকার নিম্নোক্ত

আয়াতের ব্যাখ্যায় তাহারাও নবী ছিলেন
বলিয়া মত প্রকাশ করিয়াছেন :

"এবং যাহা নাযিল হইয়াছে ইবরাহীম,
ইসমাঈল, ইসহাক, ইয়াকুব ও তাহার
বংশধরগণের উপর" (২৪ : ১৩৬)।

"বল, আমরা ঈমান আনিয়াছি আল্লাহতে
এবং আমাদের প্রতি যাহা অবতীর্ণ হইয়াছে
এবং ইবরাহীম, ইসমাঈল, ইসহাক, ইয়াকুব
ও তাহার বংশধরগণের প্রতি যাহা অবতীর্ণ
হইয়াছে " (৩ : ৮৪)।

"এবং আমি ওহী প্রেরণ করিয়াছি ইবরাহীম,
ইসমাঈল, ইসহাক, ইয়াকুব ও তাহার
বংশধরগণের প্রতি" (৪ : ১৬৩)।

উক্ত আয়াতসমূহে উদ্ধৃত আসবাত শব্দটির
(এ.ব. সিবৃত) অর্থ বংশধরও হইতে পারে
এবং ইয়াকুব (আ)-এর বারজন পুত্রও হইতে

পারে। ইব্ন আব্বাস (রা) ও ইবন জারীর তাবারী (র)-এর মতে আসবাত হইল ইয়াকুব (আ)-এর পুত্রগণ (তাফসীরে ইব্ন আব্বাস, ৩ ও ৮৪, পৃ. ৫১; তাফসীরে তাবারী, বাংলা অনু., ২খ, পৃ. ৩৬৭)। তাবারী আরও বলেন, আসবাত দ্বারা হযরত ইয়াকুব (আ)-এর সন্তানদের মধ্যে যাহারা নবী ছিলেন তাহাদেরকে বুঝায় (পৃ. ৩৬৬)।

ইব্ন কাছীর (র) বলেন, "আসবাত শব্দটি তাহাদের নবুওয়াত লাভের শক্তিশালী দলীল হইতে পারে না। কেননা আসবাত অর্থ শুউব বানী ইসরাঈল (ইসরাঈল-সন্তানগণের গোত্রসমূহ)। তাহাদের কাহারও প্রতি ওহী নাযিল হওয়ার কোন প্রমাণ পাওয়া যায় না, যেভাবে ইউসুফ (আ) সম্পর্কে পাওয়া যায় (বিদায়া, ১খ., পৃ. ১৯৮-৯)।

সূরা ইউসুফের ঘটনাবলী হইতেও এই শেষোক্ত মতের সমর্থন পাওয়া যায়। পার্থিব স্বার্থকে কেন্দ্র করিয়া নবী-রাসূলগণের পরস্পরের মধ্যে কখনও সংঘাত বাঁধিবার কোন নঘির ইসলামী ইতিহাসে বিদ্যমান নাই। অথচ ইউসুফ (আ)-এর সৎ ভ্রাতাগণ তারুণ্যে ও যৌবনে তাঁহাকে কঠিন বিপদে নিষ্ক্ষেপ করিয়া সন্ধ্যায় পিতার নিকট উপস্থিত হইয়া বানোয়াট বিবৃতি প্রদান করেন (দ্র. ১২ ৪ ৮-১৮)। প্রাপ্ত বয়সে মিসরে ইউসুফ (আ)-এর দরবারে উপস্থিত হইয়া তাহার ও তাঁহার ভ্রাতা বিয়ামীনের প্রতি চৌর্ষবৃত্তির মিথ্যা অপবাদ আরোপ করেন (দ্র, ১২ : ৭৭) এবং ইউসুফ (আ)-এর সাক্ষাত পরিচয় পাওয়ার পর তাহারা মিসর হইতে পিতার নিকট কানআনে ফিরিয়া আসিলে তিনি তাহাদেরকে ইউসুফ (আ)-

এর ঘ্রাণ পাইতেছেন বলিয়া জানাইলে
তাহারা সত্য ঘটনাকে অস্বীকার করিবার
সঙ্গে সঙ্গে পিতাকে বিভ্রান্ত বলিয়া
আখ্যায়িত করেন (দ্র. ১২ : ৮৮-৯৫)। অথচ
নবী-রাসূলগণ শিশুকাল হইতেই সরল-সহজ
ও সৎ মানুষ হিসাবে বাড়িয়া উঠেন (এই
সম্পর্কে তাফসীরে উসমানী, সৌদী সং, পৃ.
৩১২, টীকা ৩ দ্র.)। অবশ্য তাঁহার সৎ
ভ্রাতাগণ আল্লাহর নিকট তওবা ও ক্ষমা
প্রার্থনা করিয়া অনুতপ্ত হইলেন এবং পিতা ও
ইউসুফ (আ)-ও তাহাদের জন্য ক্ষমা প্রার্থনা
করেন (দ্র. ১২ঃ ৯২ ও ৯৭-৮)।